

ANTIYAS A PERDE UN YIU; ARUBA A PERDE UN GRAN AMIGO

Mey mey di Cabaret Picante diasabra anochi, mi a ricibi yamada di Jan Poets; **"preparabo pa algo desagradable. Bo amigo Dominico a bay sosega"**.

pa ora cu mi a drenta vestuario, ya e noticia a plama caba y tur bista tabata riba mi.

Mi a pone un cara alegre y a bisa mi elenco: **"prepara pa subi, the show must go on"**, pero e resto di e anochi no tabata mi anochi mas. Mi a sinta den vestuario, y a mira mi dilanti mi ultimo dlanan hunto cu Don Dominico Herrera na Corsow, durante e siman di simposio di Carnaval algun siman pasa.

Anochi hunto cu su señora Jane, Dominico a binbishitami na hotel y a topa mes ora tambe cu su amigo Sr. Milo Croes, na kende su cas el a siña conoce e dama cu despues lo a bira su señora, Jane.

E merdia siguiente mi a bay come na e mihor restuarant di Corsow como invitado di Dominico y su señora.

Despues nos a sinta algun ora na su cas den su **"cuarto musical"**, nos a toca piano, traha riba palabranan y musica pa su participacion den concurso di Himno di Antiyas, y nos a canta.

E coro tabata consisti di nos dos, y su dos ruman muhernan cu a bin uni cu nos atardi plentero.

Mester menciona sinembargo, cu na Cas di Dominico semper tabata reina musica y canto, di su infancia te na su morto.

Anochi 11 or Dominico tabata di bishita na hotel atrobe y semper den compania di su señora Jane. Nos a haci cambionan atrobe den palabranan di e Himno y su mainta siguiente ata nos sinta atrobe den lobby di hotel.

CONCIERTO DI SIGLO Y PADU DEL CARIBE

Aki Sr. Milo Croes cu hopi hendé no sa cu tambe ta un gran musico, y pianista a sinta cu Dominico riba e ultimo toquenán musical, mientras cu mi a bay prepara pa e simposio.

Mi a pensa riba e anochi di Celebracion di Dia di Tata, organiza pa Jan Poets den Radison Hotel y con despues di e concierto di Padu del Caribe, Norman Moron y Dominico Herrera, mi a bay camber di Dominico y Jane y sali te 3 or di madrugada.

Nos a papia riba su gira di **Concierto di Siglo**, su experiencia bunita na Hulanda cu e concierto, su condecoracionnan. Especialmente e

condecoracion Papal cu Dominico a ricibi, tabata su orguyo. Casi no a pasa un siman despues di nos encuentronan na Corsow cu telefon no ta zona na cas of na trabao cu **"Hermano, bendicion !"**

Mi a pensa riba mi señora, sobrina stima di Dominico, na kende el a dedica un joya di mazurca; riba Padu del Caribe su **"ruman"** cu kende casi diariamente e ta conversa telefonicamente.

Mi a pensa riba e persona Dominico Herrera cu mi a conoce 20 año pasa y for di cual momento te cu awe, a keda biba un lazo di amistad grandi, un respet mutuo grandi, un admiracion gigantesco.

Un artista, un persona conoci pa su simpleza, un persona cu asina cu bo wordo introduci na dje, bo cariño ta cay pe, pa respet cu ta briya for di su persona, e decensia cu e ta trata tur hende cune, e frasenan poetico cu ta sali di su boca durante conversacionnan, e **"bendicion di Dios"** cu finalmente e ta desea tur hende.

E pianista naci na Bonaire, biba na Corsow, cu a fayece na su isla natal, pero cu pa Aruba semper tabata tin un espacio gigantesco den su corazon. E artista cu semper tabata dispuesto pa bin toca **"gratis"** na Aruba, pa e **"pueblo cu mi ta stima y cu a dunami asina hopi felicidad"**, e semper a bisa.

CLASICONAN DI SALON

Dominico Herrera a bay laga nos y sinembargo Dominico Herrera lo keda cu nos, pasobra su mas di cien grabacionnan, composicionnan propio lo keda graba como e **"gran clasiconan di salon"** cerca nos tur.

Cada vez cu nos scucha un di su walsnan, danza, tumba, polka, mazurca o cuadriya, nos sa cu nos ta scuchando un **"clasico di salon"** cu ningun otro por toca o imita manera e gran Dominico Herrera.

Diavierna mundo a yora Mama Teresa, diasabra mundo a yora prinses Diana, pero durante e mes fin di siman, Antiyas y Aruba a yora nan Dominico Herrera.

"Hermano, bo a bay drumi mucho tempran, sin termina bo deseanan."

Sosega na paz".

Na Doña Jane, Dominguin, Joannie y familia forza, y danki pa a laga mundo conoce un Gran Personahe cu lo biba pa semper cerca nos tur.

Juby